

唐人三家集

一
函
四
冊

呂衡州文集卷第六

三受降城碑銘 并序

夏后氏遏洪水驅龍虵能禦大菑以活黔首周文王
城朔方逐獫狁能捍大患以安中區若非高岍峻防
重門擊柝雖有盛德曷觀成功然則持璫璣而弛張
萬象昊穹之妙用扼勝勢以擒縱八極王者之雄圖
道雖無外權則有備變化消息存乎其人三受降城
皇唐之勝勢者也昔秦不量力北築長城右振臨洮
左馳碣石生人盡去不足乘障兩漢之後頽爲荒丘
退居河滸歷代莫進矯亡秦之弊則可矣盡中國之
利則不然唐興因循未暇經啓有拂雲祠者在河之

北地形雄坦控扼樞會虜伏其下以窺域中禱神觀
兵然後入寇甲不及擐突如其來鯨一躍而吞舟虎
數步而擇肉塞草落而邊氓懼河冰堅而羽檄走爰
自受命至于中興國無寧歲景龍二年默啜強暴黷
隣構怨掃境西伐漠南空虛朔方大揔管韓國公張
仁愿躡機而謀請築三城奪據其地跨大河以北嚮
制胡馬之南牧中宗詔許橫議不撓時唐休璟建議非之於是
留及瓜之戍斬奸命之卒六旬雷動三壘岳立以拂
雲祠爲中城東西相去各四百里過朝那而北闢斥
候迭望幾二千所損費億計減兵萬人分形以據同
力而守東極于海西窮于天納陰山于寸眸拳大漠

于一掌驚塵飛而烽火耀孤鴈起而刁斗鳴涉河而
南門用晏閉韓公猶以爲未也方將建大旆提金鼓
馳神筭鞫虎旅看旄頭明滅與太白進退小則責琛
賁受厥角定保塞一時之安大則倒狼居竭瀚海空
苦寒萬里之野大略方運元勲不集天其未使我唐
無北顧之憂乎厥後賢愚迭任工拙異勢剛則黷武
柔者敗律城隳警固寇得凌軼或驅馬飲河而去或
控弦劇壘而旋吾知韓公不瞑目於地下矣今天子
誕敷文德稚育羣生戢兵和親七狄右衽然而軍志
有受降如敵大易有安不忘危崇墉言言其可弛柝
亦宜鎮以元老授之廟勝俾述舊職而恢遺功外勤

撫綏內謹經略使其來不敢仰視去不敢反顧永讐
猛氣無生禍心聳威馴恩禽息荒外安固萬代術何
加焉敢勒銘城隅庶復隍而光烈不昧銘曰

韓侯受命平在朔易北方之強制以全策亘漠橫塞
揭茲雄壁如三鬪龍躍出大澤並分襟帶各閉風雷
俯視陰山仰看昭回一夫登陴萬里洞開日晏秋盡
纖塵不來時維韓侯方運神妙觀豐則動乃誅乃弔
廓乎窮荒盡日所照天乎未替不冊清廟我聖耀德
罷局北門優而柔之用息元元曷若完守推亡固存
于襄于夷永裕後昆

故太子少保贈尚書左僕射京兆韋府君神

道碑銘并序

山之大者匿峯巒含氣象積高無倪而不見其險孕粹有物而不知其神此其所以爲大也德之全者毀圭方點皎厲靈機密運而智不驚愚遐標特立而迹無變俗此其所以爲全也然則大山高而可陟全德近而難知我求其倫見之於少保公矣公諱某字某京兆杜陵人其先帝堯光宅讓德儲慶建國命氏列于夏商相胄卿族繁于漢魏代濟不殞煥爲盛門大王父諱某皇朝主客郎中萊濟商三州刺史王父諱某倉部郎中太原少尹贈祕書監烈考諱某檢校都官郎中嶺南節度行軍司馬贈同州刺史或以瑚璉

之器纔施郡政或以巖廊之姿僅及戎佐與時俱息
從道而污屈不試於當年啓莫京於身後公生而岐
嶷弱而老成渾粹不散清明虛映朱絃遺音而宮商
自韻大圭不琢而符彩溢發邈是天爵爛乎人文鼓
鍾之聲日遠鄉曲之譽來逼釋褐太子正字與仲弟
正卿以賢良偕徵策入異等鴻冥雙舉當代榮之授
高陵主簿遷監察御史改殿中內供奉東都留守判
官即拜東臺侍御史參畫惟允持繩不回河洛之間
風聲尚在德宗躬決庶政本于尚書責成曹郎綜練
材實荐出方伯時超貳卿二十年間斯爲極選公由
是前後遷刑部吏部貲外郎吏部郎中奏議推美彌

綸成績南宮之故事存焉于時戡復日近勲勤者衆
都市惰遊盡垂金組邦畿豪奪半賜丹書輕禽逸於
踈網悍馬駭於柔轡上思懲抑必俟良能公由是前
後歷奉天長安二縣令仁護鰥惇智鈐豪右與人之
遺詠在焉望由實躋任以望重選曹未幾給事于中
既居駁正之司不撓當官之論屬東南歲歉俾又惟
艱出爲常州刺史天寶之後中原釋耒輦越而衣漕
吳而食一隅重困五紀于茲公臨之清貞結以忠恕
給存惠寡務穡勸分一法以去其侵漁多方以備其
灾患以逸道而使繕完允濟以與道而取賦入先期
聲聞天朝考績連最轉蘇州刺史二境之間百里而

近靈源自出殊派共清膏澤所霑異壤同潤下車朞
月報政如初加秩賜金借留累歲無何彭沛喪師兵
驕地偏安危所繫朝議難之乃以公檢校祕書監兼
御史中丞賜紫金魚袋充徐泗節度行軍司馬重其
威望將委旄鉞而未命程伯徐方之軌旣同不見賈
生宣室之徵遽至擢吏部侍郎倫品甄明通簡節適
勢有探湯之熱我以靜濯衆有鼓簧之喧我以心聽
馴致其美闇然日彰不求無失職之人人自以爲不
失職矣輟拜京兆尹德刑交修寬猛相濟匪設鉤距
物無遁情匪耀鋒鋌機無滯斷浩穰之理不肅而成
不求有不欺之吏吏自以爲不能欺矣俄改太子賓

客辭劇就閑圖南之勢一息選德求舊居東之命惟
重遷檢校工部尚書兼御史大夫充東都留守東都
畿汝州都防禦使自盜起幽陵兵屯諸夏涉淮而北
軍國異容分陝以東古今殊寄公講信修睦外張保
釐之政完備訓戎內寓折衝之令矛戟不露德輝藹
然遐邇傾首以承風強暴革心而知懼今上嗣統就
加檢校吏部尚書方入僉諧屬毗大化不幸嬰疾表
求退歸優詔除太子少保冀其休復將有後命神祇
竟昧藥禱無降以元和元年二月十二日薨于東都
履信里之私第享年六十有四寵贈尚書左僕射輔
車西歸制使賻弔太常褒議謚曰某公哀榮備矣夫

人河東裴氏侍中耀卿之孫給事中臯之女德門鍾
美淑聞充塞薜榮早落著兆叶期即以是年五月二
十一日合葬于萬年縣高平鄉少陵原禮也公孝悌
天至行有餘力仁義性得匪俟伏膺不飾表以近名
恒縱心而中矩清虛簡淡而應物不倦通曠夷易而
及門無雜不尚意氣而然諾篤至不好臧否而鑒識
超倫與故相國齊江西映穆宣州贊贊弟侍御史貞
爲文章道義之友可以視其所親矣今吏部郎中扶
風竇羣抗迹毗陵退身進道公三挹郡榻之上振
天墀之下不數歲間蔚爲重器可以視其所舉矣分
正東郊開府辟士則有今右司郎中燉煌段平仲倉

部員外郎安定皇甫鋪禮部員外郎清河張賈京兆
韋嗣隴西李景儉中山衛中行平陽路隨皆羣彥之
秀出一時之高選可以觀其所任矣加以志尚幽遠
冥搜好古所居第內必有松石之致退公暇日常以
圖籍自娛一字愜心金玉不顧片言同趣布褐無間
亶亶然若見道之所存陶陶然不知歲之云晏於戲
策名從事四十餘年朋友罕聞得喪之言家人莫見
喜愠之色坦懷以處推分而行無恩於人人亦不怨
無猜於物物亦不猜履信順以優游保福祿以終始
其名敎之大雅者歟有九子長曰元質前常州義興
縣尉次曰穀前邠州司倉次曰璋鄉貢進士能修辭

立誠克家致美茂揚風訓休有令聞次某某等皆殊
姿異識發於童齒慶善之餘也以某獲窺牆仞見託
篆述究賢人之業信而無媿申孝子之志直而不文
其詞曰

利建于商介圭作寶爰立于漢緇衣改造克昌厥允
奕世載考亞尹擅名郎中懷道莫躋貴仕莫享難老
蘊靈儲休以啓少保丕顯少保其德惛惛有倬遐姿
曠哉靈襟顯仁山立藏用淵沈煦如冬陽藹若春陰
白圭三復克保明心黃鍾九變莫匪和音靜專動直
謙進柔克宜踐公輔以楨王國促路頓軌中天墜翼
少陵古原拱樹寒色穹壤可弊唯名不息金石垂之

以慰罔極

唐故金紫光祿大夫檢校兵部尚書使持節
都督秦州諸軍事兼秦州刺史御史大夫充
保義軍節度隴西經略軍等使上柱國彭城
郡開國公食邑二千戶贈尚書右僕射中山
劉公神道碑銘

并序

武有七德以先九伐聖王所以經邦也戰有六器以
先五兵賢侯所以述職也然威德並運仁勇相宣功
業見乎禮義之門將相出乎詩書之府若有覽古成
敗與時行藏道惟忠貞權利變化兵機生於盡性師
律本乎修身飾怒之鈇鉞有歸當仁之壇場不讓考

諸名實何代無人公諱某字某其先帝堯之允事夏
后者曰累隨會之子處咸陽者爲劉秦滅六雄遷于
豐沛漢有四海別封河朔公即孝景帝中子中山靖
王勝之後也遭晉喪亂流寓幽平燕趙之朝不絕如
綫十一代祖後魏尚書左僕射燕郡公靈助始有大
功建茲元社遂爲范陽人焉厥後逶迤世有潛德詳
在家謀略而不書曾祖特進檢校司衛卿臨洮軍使
贈宋州刺史諱宏遠恢持重之姿撫寧洮罕王父特
進檢校右金吾衛大將軍太常卿大同軍使贈揚州
大都督諱貢厲摧堅之氣震疊氏羌烈考開府儀同
三司幽州大都督府長史帶正省兵吏刑戶四尚書

左右僕射平章事兼御史大夫幽州盧龍軍節度使
累贈太師太保諱怱以正有功以寬得衆書伐盟府
擁旄本邦於戲以二特進之志略用而不貴以太保
之忠勲貴而不壽水積而深縱壑之鱗躍風積而厲
垂天之翼奮慶靈久鬱必有勃興公即先太保之次
子今侍中之介弟伯也嗣職幽都仲也揚威隴坻虎
旂龍節交萃於一門開國承家並登於九命倬絕天
下輝動人倫勃焉之興斯可信矣公長源濬發自天
鍾美直尾箕之下別稟英精生恒碣之間得其全氣
顯仁藏智勤孝朴忠大略小心寡言敏行虎抱崖窟
莫能象其深沈鶚聳青冥未足擬其超遠幼挺竒節

長有雄姿森武庫之鋒鋌錯文昌之光色閱禮之別
惇詩之和觀易象之元得春秋之正申商之法撫實
而除苛孫吳之書取權而去詐行有餘力則遣詞比
興多中於雅音材之旁通則騎射劒擊皆窮其妙用
真所曰多能博識允武允文者也公弱冠之歲朱滔
敗歸幽陵狼顧未定先太保時爲行軍司馬用公之
策與滔定計戢兵徹警洗疊歸誠致父於曲突之勲
拯人於墜塗之難由是山東侯伯始聞其名是歲孟
秋滔卒于鎮幽人懷德推奉太保方執謙志未允誠
求公以爲幽燕本負氣之鄉豪傑陷失節之地自新
無路從亂如歸安危生於俯仰逆順決於指顧權必